



SUNDAY SCHOOL TRAINERS' TRAINING



REVIVAL MEET - 2025 (REVIVAL COMMITTEE LEH REVIVAL SPEAKER)

Standing (L-R) : Tv. ST Satboi, Pu Kamzathang, Tv. M. Sasang, Tv. Duhlian Pauthianmang
Sitting (L-R) : Rev. Thianganlim Vaiphei, Rev. Andrew LR Khiangte, Rev. K. Neihzial,
Rev. Vanlalchhuanga, Rev. C. Lalremruata, Upa Nengkhothang,
Upa Zamkhai, Upa Khawlkap

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



**PENTIKOS NI KIPAT AH THAGAU THIANGTHO
NASEP - MIMAL HINKHUA**

- Gam leh Nam leh Khawtâng â Ding ah Mi Phachuam
- Kochuam Kitodel
- Khanglaite leh Sex

Editor : Rev. Kamkhotinthang Neihsial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Neikhovak, Secretary, CKNP
: Tv. Lianmuanthang, Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	02
3. Pentikos Ni Kipah ah Thagau Thiangtho Nasep - Mimal Hinkhua	04
4. Gam leh Nam leh Khawtang â Ding ah Mi Phachuam	08
5. Kochuam Kitodel	12
6. Khanglaite leh Sex	15
7. Khristian Chawndan leh Pupa Chawndan	21
8. Khawvel in Jesu a Mamaw Hi	27
9. Mutheilo Pathian Mu Sek a Ngai Hi	30
10. Khrista Thuhiatpitute	34
11. KNP Huang	36

SYNOD PUIPATE

Moderator : Rev. Vanlalchhuanga
Secretaries : Rev. Andrew LR Khiangte (Sr.)
: Rev. Summinlian Vaiphei (Jr.)
Finance Officer : Upa Tinliankham
Statistician : Rev. Thianganlim Vaiphei
Executive Secretary : Rev. Kamkhotinthang Neihsial
Consultant : Rev. C. Lalremruata

Hinna Vâk ah thu kisua zosia hi Editor ngaidan a hi suak puai

Pauchapna Thupi:



1. Tangphai Presbyterian Kochuam sung ah Pastor, Pro. Pastor, Kochuam Upa leh Kochuam Committee member chuam chuamte'n Pathian Thagau Thiangtho puina gual ah Kochuamte a puihuai zing theina ding un.
2. I Kochuam mi, sepna leh zilna zia ah mun chuam gam chuam ah umte â ding in.
3. I gam ah Doctor, Nurse leh Hospital/ Clinic chuam chuam ah semtu zat chuam chuamte â ding in pauchap hitiu.
4. Gamsung buaina ah panlatu pawl chuam chuam ah puitute â ding in pauchap hitiu.



PASTOR INDUCTION - SUMTUKPHAI PASTOR BIAL

THAMUANTU THAGAU THIANGTHO NGEI CHU

Hinna Vâk simtu dawitakte Pentikost Ni Chibai!

Lal Jesu'n zia khawvel ah a hun tawp tung di thu a hia, a nungzuite a nutsia nung ah thamuantu dang a hun sawl di thu a hil hi. A genlawk gual ngei in 'Thamuantu Thagau Thiangtho' chu Pentikost Ni'n a hung tung hi. Thamuantu hi hun chawmcha sung â di bep hilo in, kumkhua ama gingtute kiang ah um ding ah piak a hi. Zia Thamuantu chun gitlo thu ahte, dikna thu ahte, vaihawmna thu ahte khawvel thiamlo dante a hiatsak di thu, ama phuak kawm genlo di a hi thute, thutak ah mi puihuai di a hidante a hil hi. Khawvel ah mihingte i thamuanlo ziau hete di chun thamuanna lûlzia, a pawimaw zia vang hechian ngei inau.

Khrista ah kipat Thamuanana chun sukgentheina hun in ei umpi intin, ei thamuan di a hi. Jesu chu a damlai in Thamuantu a hi. A thi nung inle ama nungzuite a thawmhaulona ding un ama mun lua ding in Thamuantu a hung sawl hi. Nungzuite lung thawmhau leh lauthawng tak ah a um lai un Jesu'n ama hepите leh a thu mangte kiang bep in thamuantu a sawl hi. Thagau Thiangtho chenchilna tepkhalo lai la hi chun Khrista dawidan ah chialo hi kha'nla!

Sakhua dang dangte'n le a hawl uh chu thamuanna leh chawldamna a hi. Zia khawvel thil leh hindante hin kuama thamuanna a pe tak tak thei pua'i. Zia ah kipat hin Lal Jesu chu Thamuantu a hizia a kilangchian hi. Lal Jesu'n thamnuana ei nutsia piak hi khawvel in a piak theilo, a nei ngailo thamuanna chu a hi.

Thagau Thiangtho nasep hi Khristiante lak in a tung zing a, na a sêm zing hi. Chandan leh dawndan vang kibang khel pua'na. Thamuantu Thagau Thiangtho chênchilna, sukthakna leh mapuina chang chiat thei ding in Lalpa'n simtute ei malzawl chiat ta hen!



Kochuam Huang

Kochuamte vethakna

Officer's Meeting 39:6 dt. 10.02.25 chun Jiribam Pastor Bial ah a la um, Lengluang Kochuam, Tuaitengmun Kochuam leh Jiribam (Jirighat) Kochuamte vave ah vakantha ding in Rev. Luttinlel a guat ah, Ni 11 April 2025 ah kipandawk in Kochuamte tawh Taksa leh Thagau ah kipawlkhawmna hun mangkhawm in Programme lawting tak in a va mang a hi. Ni 2 May 2025 ah khan Lamka a hung tung kit hi.

Kochuam vethakna hi Pathian thu genna, In chawtna, Lalpa Zan An Sacrament, Baptisma Sacrament, Kichensakna, Nausen Latna, Mimal Pauchap piakna hun te'n a mang hi.

Sunday School Trainers' Training

Officer's Meeting 40:3(4) dt. 18.03.25 dungzui in Ni 1-2 May 2025 sung in Tangphai Provisional Synod Office, Thangkai-Lungpau Hall ah Sunday School Trainers' Training nei a hi. Training hi Bial tin Sunday School Secretary leh mi pakhat (1) hung kisawl in mi

30 vel a pang thei ui.

Training ni khat ni in Rev. C. Lalremruata, Consultant in Kilawpna leh Thumasa genna hun a mang a, Pi Hoibetty in *"Child Psychology, zilsak Dan leh Discipline"* thupi mang in Trainers te zilsakna a nei hi. Rev. Kamkhotinthang Neihzial, Executive Secretary in *"Sunday School Pawimawna"* ti leh Upa Dr. Soilalsiam in *"Child Evangelism"* ti thupi mang in a zilsak ui. Ni 2 May 2025 ni'n Rev. Vanlalchhuanga, Moderator in *"Zilsaktute mawpuakna"*, Upa Lalbiaklian Vaiphei in *"Kikaihuaina lam"* ti leh Rev. Andrew LR Khiangte in *"Sunday School pha nei didan"* ti thupi mang in zilsakna a nei ua, hun tawp pen genkhawmna hun in a mang thei ui.

Sumtukphai Pastor Bial Pastor Induction

Synod Kikhawmpi 3 veina Pastoral 13 (3) leh OM 38:13 dt. 20.01.25 guanggalna dungzui in Rev. Siamlalon, Aizawl Theological College ah M.Th. zil chu a hung zilzaw tak tawh kitawn in Ni 4 May 2025 ah khan Sumtukphai Pastor Bial enkawltu ding in kawidetna

HINNA VÂK

(Induction) Programme
mat a hi. Kawidettu, Rev. C.
Lalremruata, Consultant.

Revival Meet

Synod Revival Committee leh
Synod Executive Committee
guanggalna Tangphai
Presbyterian Church Provisional
Synod Revival Meet 2025 chu
Ni 23-25 May 2025 sung in
Hill-Town Kochuam zintunna in
lawting tak ah matzaw a hi.

Rev. K. Neihsial, Executive
Secretary in meet bulpat nitak
ah thugenna hun a mang ah,
Revival Meet Speaker Rev. C.
Lalremruata, Consultant ah
kipat in Pathian thu ngaithak
zawm ahia, a tawp nitak in Rev.
Vanlalchhuanga, Moderator ah
kipat in Pathian thu ngaithak
a hi. Synod Choir, Pastor Bial
Lapawl pasagi (7) leh Hill-Town
Kochuam Lapawlte ah kpat
in le Pathian chawihawina La
ngaithak a hi.

Kochuam Ni Pawimaw

June thasung ah Kochuam
Ni Pawimaw (Pentecost
Ni leh Gualphalote Ni) hi
Kochuamte'n Taksa leh Thagau

ah lawting tak ah i mat chiat
thei ding uh i kidawisak ah,
Pentecost Ni hi kumsin ah i la
bawl zing gualu'n PCI General
Assembly Pauchapgualna
thupi mang ah pauchapgualna
leh Pentecost Sermon thupi
"Thagau ah Pumkhat" mang ah
kikhawpna um di a hi. Zia hun
ah thilpiak kilakhawmte chu
PCI â di a hi. Chuleh, Ni 7 June
2025 (Kiginni) nitak dak 7-8
kikal ah hin PCI in a guanggal
Prayer Chain Kochuam tin te'n
mani lemchang dan chiat ah
a lawting thei di pen ah mang
ding in i kidawisak ui.

Myanmar Kochuamte vethakna

Ni 17-19 May 2025 sung in
Rev. Kamkhotinthang Neihsial,
Executive Secretary leh Rev.
C. Lalremruata, Consultant
te'n Myanmar gamsung ah
i Kochuamte leh Semtute
vethakna leh kimukhawmna
Moreh mun in a nei thei u'i. Gâl
ziak ah Kochuamte haksatna leh
maban ah panlak zel didante
genkhawmna hun leh Pathian
Biak Kikhawp khawmna hun in
a mang thei u'i.

PENTIKOS NI KIPAT AH THAGAU THIANGTHO NASEP – MIMAL HINKHUA

~ Rev. T. Zuanlal
New Lamka (G)

Thagau Thiangtho Van ah kipat ah Vakhu gual ah a hung suk khan Khrista chu van ah a nasepna mun a tun tâk dan a sulang a hi. Jesu'n sual tatna nasep a sep zaw tâk zia in Pa Pathian changlam in a chuta a hi. Thagau Thiangtho a hung na a hin a thutiam a supiting ta a hi. Pathian dik zia le a sulang bawk a hi. Jesu chawihawi ah a um nung ah thil hung tung ding chu a kipan ta a hi.

Chanchinpha'n a hun tut khawm thil panga pawimaw tak tak a tiu chu: Taksa a hung channa (a hung pianna), Sual tatna, a thawkitna, van ah Jesu a kaltona leh Pentikos te a hi. A pagukna chu dan phat leh hung tung di, Jesu hung kitna hi a hi. Pentikos ni Thagau Thiangtho a hung tun khan Pathian leh mihing kikal ah hun thak pawimaw tak a hun hei dawk ta a hi.

Pakhatna chun Khrista taksa a hung channa hin mihingte tandawk ding ah Pathian ngei mihing a hung

channa chu a sulang a hi. A panina chu Pathian diktat chun misualte thiam a chansakna hi a hi. Apathumna chu Satan leh Gawtmun chu zaw in a um ta a hi. Palina chu van ah a kaltona hin sual ngaithiamna (ngaidamna) nâ chu a sep zaw a hi tâk zia a sulang a hi. A pangana chun Pentikos hin Pathian Thagau chu khawvel ah Kochuam ah leh mimal mal chung ah a thiltup supiting ding ah hung a hidan a sulang kit a hi.

Judate sakhua Kalendar chun kumsin ah a nei sek uh

HINNA VÂK

Kutte chu a taklang a, ziate lak ah pawimaw diak pathum – Chiakan Kut, Bawkcha Kut leh Pentikos kut a hi. Kut hun ah hin Pawsal zosia Lalpa ma ang ah a lat ngei ding ah phut ahiu a hi.

Chiakan Kut hin Israel chate Aigupta gam ah suak leh sal ah a tannau ah kipat mak tak mai ah a pawtdawnau hun kha a etsak a hi. Belamno thiangotho (*demna bei*) a tha nung ua (Pdt 12:5) a thisan kha Israel inkuan/sungkuan te'n a kawtkhak biang teni leh a chung ah a nu'u a, Belamno sa chu mei ah hai min in a neu a hi. Belamno thisan chun Pathian vaihawmna ah kipat tatdawnau a hun tut a, Thuthung Lui ah Chiakan Kut chu Kalvari Khrista thina khan a hun subukim ta a hi. *"I chiakan kutnau Khrista chu eimau a ding ah latzaw a hi ta ngal a"* (1 Ko 5:7). Jesu Khrista chun a thisan in mihingte hi kumtuang â ding in ei tandaw ta a hi.

Bawkcha Kut hin Aigupta ah kipat Israel-te a pawtdaw lai ua Bawkcha maimai ah

a la cheng a hi ziau etsak na a hi. Zia kut hi thaithak laitak ah a nei sek zia un "Thaithak Kut" (Pdt 23:16) le a tibaw ui. Aigupta gam ah kipat tatdaw a um zia ua a kipaknau chu Khrista'n a tatna ah khan sukbukim in a umta a hi.

Pentikos ni hi 'Chawlkal Kut' ti ahia, a zia chu Chiakan Kut ah kipat chawlni a sagi veina ahia, ni sawmnga a tin ni chet ah siam a hiziak a hi. Zia kut hi bulâk kipat til in a mang sek ua, thaithak masa pen (*Ga masa*) kut le a tibaw ui (Kis 28:6). Thuthung thak ah Pentikos chun Thagau Thiangotho kipatna a kaw in Gingtute chu Lal Jesu'n a nungzuite a puikhawm gual ah khan puikhawm in a um ua, Jesu'n Thagau Thiangotho mang in van ah kipat in ei hun umpita a hi.

Thagau Thiangotho chanchin i zil pat lim ua i kidawtnau masa pen chu: Bang zia ah Thagau Thiangotho a hung ngai a h'em, ti hi a hi. Bible i zilnau ah kipat a dawnhuna mudaw

ngal ziang hitiu. Zia khawvel ah hi nasep ding a nei zia ah hung a hi. Kochuamte leh Khristian mimal ah te nasep ding tamtak a nei a hi.

Gingtute Hinkhua Thagau Thiangtho nasep:

Gingtu mimal hinna Thagau Thiangtho nasep dan hi lam chuam chuam ah genthei a hi. Pakhatna ah chun Thagau Thiangtho chun Khristiante lunggil suvak a, Pathian in a thagau ah chun i kiang un a taklang tai, Thagau chun bangkim a hawl daw sek ah, ahi Pathian thugil takte le (1 Ko 2:10). Zia khawvel dan gual ah hin um kiu inla, Pathian dawigual, a pha leh pawm tak leh a bukim chu la hettheina ding in, a lungthim uh siamthak ah um in, hung danglam zaw tau in (Rom 12:2).

Dr. John Maykay chun, *“Ngaitua lawkna nei keilo ah thil piting hi ding ah kipiak chu a pha puai. Thil hi ding bangma huamlo chu lunggil ngaituana mai hi chu sep daw theilona zosia bulpi ahi”* a la ti hi a dik a hi.

Panina chun, Thagau Thiangtho chu gingtute lunggil sukvaktu bep hilo in, amau ah a chenkhum a hi. *“Ahileh la taksau chu la sung ua um, Pathian kiang ah kipat la muu Thagau Thiangtho In ahi ti leh nangmau â la hita puau hi ti helo la hiu em? (1 Ko 6:19).*

Ei uh gingtute hin Pathian Thagau Thiangtho chu i taksau ahin a cheng takzet ahi ti hechian leu hin chu i thil nek leh dawn teu leh i lekha sim teu tiang in chitthei (*pilvang*) khawlaw ngei ding ihu. Paul chun, *“Midangte kiang ah ka tângkopi nung ah paithak ah ka um lona ding in, ka taksa hi ka sawizawi in ka thunun a hi (1 Ko 9:27) atia. Paul in a taksa chu a thunun ah, zia hin bawkkhup ah sual sim ah kipuan a kûl dan a sulang hi.*

Gingtute chung ah Pathian Thagau Thiangtho nasep dan tângpi a chawm lam in vak gen leu hin, *a thamuan a (Nas 9:31); a puihuai a (Joh 16:13), a suthiangtho ah (Rom 15:16); a thugen ding in*

HINNA VÂK

a hil a (1 Ko 2:13); *Nasemtute chiana ding a kawkmua* (Nas 13:2), *hatlona a panpi a* (Rom 8:26); *Gingtute chu a chialona ding te a hiatsak sek hi* (Nas 16:6-7).

A tângpi lakkhawm ah chun, mihingte kiang ah Thagau Thiangtho nasep chu pau pathum bep in genchian thei a hi. ‘*Chung ah*’, ‘*kiang ah*’, ‘*sung ah*’ tite in Thuthung Lui hun a chun a mitêlthe chung ah a tung sek hi, hun bang chan a hem hun sung chu a châmsek hi (Vai 14:19). Thuthung Thak hun ah chun

“Khrista” chu a nungzuite “kiang ah” taksa um zing ah gen a hi (Joh 14:17). Sawlchakte nasep bung 2 na lam ah chun Pathian mite sung ah cheng zing a hita a hi (1 Ko 6:19) ti i muu hi.

Lalpan sim zosia a ding in malzawl ta hen.

Note: Zia Article hi Billy Graham Lekhabu Thagau Thiangtho ti bu kisua, Khristian Tlangau bu kisua, Kochuamte â ding ah phachuam ngei ding ah kinepna a um a, hung kisua sawn a hi.

“Japan ah chun kuang hi a sukkêk khak phat ua leh a kêk hal haw chu chawmkhawm in sana tui in a zawpmat kit sek ua, zia chun a kêk masang sang in zem hawitak a siam dawk sek hi. Zia chu thil sia sa kisiam thak chu a etlawm dan etsakna’n a mang uh a hi.

Mihing te hile zia gual ma chun bang gual in siatna tuak in, i hinkhua hin siamphat zawlo ding gual ah siatna tuak in, Pathian leh mihing mit tung zolo ah gitlona bawl ah siatna tuak gual in kigel ma lehin le, i kisiam thak ah, zia kuang kisiam thak gual ah, i phatlo na lai te kha siamthak ah Pathian thu in a mal mal te kha belkhawm thak le hin, hinkhua masa sang in a nunung zaw chun Pathian hawina hung sulang ngei in ah.”

GAM LEH NAM LEH KHAWTANG A DING AH MI PHACHUAM

~ Upa Khamneithang
Hill-Town

Pathian in mihing masate - Adam leh Evi - Ama mel kibatpi in a siam a, lei chung ah vaihawm ding leh thunei ding in a kawi hi (Thl 1:27-28). Zia Eden huan ah thupiak ah kipat chun thuneina leh vaihawmna bep a pawt pua, mawpuakna liantak a liangko un ngak a hia, zia mawpuakna chu tulai khawvel ah hin gam vaihawmna sawlkar lam ah te, sungkuan ah te, kochuam ah te, khawtâng kipawlkhawmna ah te leh mimal ah te khuksak in a um hi. Mihingte hinkhua sukha thei lampi chuam chuam ah vaihawmna fel tak a um chu thil siam i hina zia uh kingakna khuampi a hi ti thei ina.

Thubul: Pathian thupiakte zawm ding ah ko te i hui. Pathian dawilam thilte Jesu kam ah thupawtte'n ei hiatsak tai. A thupiak pawimaw pen chu *"Lalpa la Pathian chu la lunggil zosia, la hinna zosia leh la ngaituana zosia'n la hepi ding ahi"* ti hi a hia, zia zawm ding ah chun *"Nangma la kihepi gual in la vengte la hepi ding ahi"* ti hi a hikit hi (Mat 22:36-39). Jesu'n Samari mi ngilnei chungchang tekhnin thu ah

a gen gual in, i In vengte lak ah chun ei gual hilo deu, danglamna nei – khawtâng khawsak dan ah, sum leh pai dinmun ah, pianken ah, sakhuana lam le a pang hi ti hiatchian a pawimaw hi (Luk 10:25-37). *"Nangma la kihepi gual ah Invengte hepi"* tichun khawvel khawsakna gam leh Pathian lalgam ah i chan gual gual midangte'n le a chan theina ding ua panlakna a huam hi.

HINNA VÂK

Zia chu a hi chun, midangte â ding ah phachuam, gam leh nam â ding ah phachuam thil chu bangti hiat di? Khawtâng â ding ah mi phachuam hi theina ding ah bang bawl a ngai diam? “Thîk in thîk dangma a tât-hiam gual in, mihing khat in midang khat hetna a tât-hiam thei hi” (Tpl 27:17).

Hiti hin vak enzui leu hin ut um i sa a hi. Thil pha leh phalo hiatchianna bailam pen, bawl leh bawlo ding kichetna bailam pen chu midangte a sawk khak leh sukkhak dan, bang gual tiang ah mite hindan a sukha em ti leh a phachuam lam in midangte a hetkha em, ahiloleh, umzia bei - buaina chawktho tu mai mai a hi em ti ngaitua masak a pawimaw takzet hi. Bawlo ah le khawklo, thil bawl zia ah nawngkaina piang thei thil tamtak a um thei bawk hi. Zia chu pilna tâksap zia in mi tamtak in a khenthiam sek puau a, nam leh gam leh khawtâng a buai khawlaw sek a, mipite’n a thawk khawlaw sek ui.

Thil pawimaw pani um:
Mi phachuam hina ding ah pawimawpente lak ah khat chu mimal thiltupte gual in khawtâng thiltupte hi ngai pawimaw ah nei in panlak ham ham ding a hi. “Kuama’n ama â ding bep enlo in, midang â ding le en zaw hen” ti’n Sawlchak Paul in Philippi khuu gingtute a vaithak malam hi (Php 2:4). I gam in haksatna liantak a tuak sek chu mimal tupte hin khawtâng thiltupte a liakhu zo sek a, mi tamtak in ngai pawimaw in a kawi ngai puau. Zia bep chu hilo in, mimal thiltupte leh khawtâng thiltupte a kibang ah ngaina hi a lian a, ei puimang nuam ma ma hi. I gam in haksatna a tuakte lak ah pakhat chu politician beidawngte zia a hi. A na deu maithei, himaleh, thuzuau chu a hilo a hi. “Bangkim ka hun nunmu ah, migentheite panpina ding ah la sep gim didan uh leh, Ama i Lalpau Jesu ngei in, “Lak sang in piak in lukhawng a nei zawi,” a ti kha hezing un,” tia Nasepte 20:35 ah

kigen lam ah gingtute i kilekit thei masiau chu hin manpha hing tak tak thei puai tiu.

Mi phachuam tak hina ding ah pawimaw dang khat chu lungthim dik put (nei) a ngai hi. Patrick Jake O'Rourke, American journalist leh lekhaziktu minthang tak mai chun, "Bang hilehle, damdawi a h'em, zu a h'em hi khawtâng natna bulpi chu a hi puai. I buainau kipatna bulpi i hawl ding uh a hi chun khamtheite ah etchet a ngai pua, a tena ding zawk chu mingawl pil kisa, bangma hiat neilo hilehle he kisa (mimawl), mi du-am leh thunei utna lunggil tawh khawsate hi etchet ding a hi" ti'n a gen hi. 1 Korinth 3:18-20 in, "Nang leh nang kithêm kin" a tia, "Ama'n mipil chu a dawha thûknau in a man sek hi" a ti a hi. Pathian neilo kipilsakte chung thu in Solomon in hiti hin a gen hi: "Mi ama bep pil kisa la mu kha ngai em? Zia gual mi sang ah chun mingawl chu kineppi a um zawi" (Tpl 26:12). Hin phachuamlo, a dinmun uh

chu kinepna umlo a ti top mai hi.

Kuate'n bang gen?: "Bang atia khawvel buaina hi veng theilo a h'em?" tia khatvei a zinvelna ah English mi lasathiam minthang leh khawvel ah chamna umna ding ah nasatak ah panla zing John Lennon chu Journalist ten a dawt ua leh, "Khawtâng kivaipuakna hi mingawlte'n thiltup ngawlhuai tak nei ah a kaihuai ziaak uh a hi" ti'n a dawnhu hi. I gam dinmun i et a hileh dik thei ding in ginchak a um hi. Khawtâng â ding ah mi phachuam theilo dingte a tam ziaak a hi. Jawlnei Isai chun, "Nanghaw pil kisa, hethiam kisate haw, la chung uh a gik hi!" (Isai 5:21) a ti a hi.

America mi lemchangtu minthang James Baldwin chun, "Khawtâng ah mi lau um pen chu chân (matsua) ding nei talo mihing a hi" ti'n a gen hi. Dwight D. Eisenhower, America president 34-na chun, "A thubulte sang ah a chanvo lulte ngaisak zaw nam chun

HINNA VÂK

chawmlo kal in a hina leh
lulnate mansua ina” ti’n a gen
hi. Africa mivawm minthang
Nelson Mandela chun le hiti
hin a gen hi, “Khawtâng in a
chate a etkawl dan sang ah
khawtâng thinlung putdan
taklatna kichianzaw um thei
puana.” Ngaitua zui tak tak
chu a pawimaw hi.

Khakna: Khawvel in a ettawn
ding nasatak in a hawl a,
Sawlchak Paul in Romte 8:19
ah kilawm tak mai ah a gen
gual mamaw tak in a ngak
zing hi: “Thilsiam zosia chun
kinem tak in Pathian chate
kilatna ding chu a ngakla ma
ma ta ngal un” a ti a hi.

A chung ah Pathian Thu in
a gen, thilsiam zosia’n kinem
tak ah a ngak la ma mau chu
bang a hi em ti i ngaitua zui a
hi chun mi hat leh mi lopite a
h’em, a hiloleh tulai lemchan
ah super hero-te gual ah hat
leh thupite ngaituana’n le
a um kha maithei, himaleh,
thilsiamte’n a ngak la

ma mau hi hatna, lopina
leh thuneinate hizawlo
in ginumna, diktatna,
kipumkhatna ngaina,
midangte hepi thei, kiunauna
ngaina mi, ngilneimi,
zaidawna leh dikna pawdawk
thei leh nunmu thei dingte
zawk hi ngak la ma ma ahiu ti
a gennawp zawk hi ding a hi.

Matthai bung 5 ah Jesu’n
tâng chung ah a thugente hi
gam leh nam leh khawtâng
hawina ding leh phatna
ding ah kibulpatna ding ah
tulai pau hileh ‘preparatory
class’ ah subject a hi. I
umna mun chiat ah ‘vak’
leh ‘chi’ hi theina ding leh mi
phachuam hitheina ding ah
zia ziltibu ah kizikte hi enpha
thak in, hechian in, hinpi
leu hin gingu masate gual
ah a phalam ah “khawvel
lepkhupte” (Nas 17:6) chu
hii tiu in, ziagual hinkhua
mangtute chu midangte a
ding ah phachuam, hinna
Pathian in mal a sawm
hingtute chu himai ding i hiu.

KOCHUAM KITODEL

~ *Upa Lalbiaklian*
Lamka

“Kochuam kitodel” ti chu midang ahiloleh pawl dangte suhbuailo ah, ama leh ama kichawmzo, ki-enkaw! thei, vâi kihawm thei liai liai genna a hi ti hi genlat masapen in ka nei nuam hi. A zia! chu kitodel ti hin lianpi tak huap thei in a kilang ah, i hiatthiam dan kibanglo thei a hi zia! in tu ah i mat nawpna pen ah hin chu huaplianlo a hi ti hechian phawt hitiu.

Kochuam ama ngawn ah dingdetvilvel ziang thei, kuama dang kithuapina mamawlo chu tu ah ‘kitodel’ i ti hin huaplo a hi ti he phawt hitiu. Tu ah ‘*mani kitodel kochuam*’ i ti pen hi chu midang/pawl dang kithuapina le mamaw sek, hilehle zia midang kithuapina ah chu kinga pumlung ziang le hi diaklo, a mamaw tamzawpi chu ama’n kisépdaw! thei tina a hi. Zia tawhbang Kochuam chu hi thei leuhin ut a um takzet hi! Pathian thu’n, “Ka hausa hen, nei leh lam ah ka pung hen, bangma ka tasam pua’i la ti’n...” (Tpn.3:17) ti ah Laodikea Kochuam a vauhilna hi thukhawk tak a hi. Ziagual ah mani kimuang, tâksap nei ah le kihe talo i hi khak diu hi a lau um taluai.

Khaileh, kitodel pawimawna lam gen ta’itiu... Kochuam khat i hi ngal ua leh i kitodelna ding uh thil tampi tak um ngei ina, a bawn ah genkim suak gawlo in, pawimaw ah i hiatte gen di i hiu.

1. Pathian thu hiatna lam ah.

Presbyterian Kochuam hi Pathian thu pawmdan nei chuam Kochuam a hi zia! in Pathian thu hiatna lam ah i kitodel uh a ngâi hi. Nam thil ahiloleh thildang zia! ah va ki-presbyterian ziang theilo a hi. I presbyterian-na pi pen uh chu Pathian thu i pawm dan uh, i hilchian dan uh, i zawp guat danteu hi a hi. Kua a h’em khat in bang gual gual a he’m in Pathian thu

HINNA VÂK

hilchian in, gen thiam ma ma ziang lehle i Kochuam pawmdan tawh kituaklo a hi chun i ngâikhawklo ngam ding uh a hi. Ziagual ah chu Pathian thu pawmdan leh hilchiandan, hiatthiam dante hi kibang veklo i hi ziak un ei uh Kochuam in i pawmdan leh hiatthiam dan ua hi i kitodel zaw uh ngâi a hi. Midang thugentu ahiloleh Pathian thu thiam i gawi zel uh ngâi a hi chun, mi'n i chung ah thu nei intin, ei uh gindan leh pawmdan ah dingdet zo lo di i hiu. Ziaziak chun, ei uh gindan leh pawmdan tawh kituak thugen thiam i nei uh a ngâi ah, Pathian thu hilchian thei di mithiam le i nei uh ngâi a hi.

- 2. Pilna lam ah.** "Pilna" ti hi Bible ah i mudan tak ua chun nisin hinkhua matdan thiamna, thil themthiamna, lemguat thiamna, midang tawh hinkhawm dan thiamna, kithuakhawm dan thiamna tite genna hi pen in a kilang hi (Pdt.36:1,2, Dan 34:9, 1 Le 3:9,12). Zia thumal 'pilna' ti chu huaplitan tak in mang hitiu, thiamna leh hiatna

chuam bîk neite tiang le huapsak hitiu. Masang lai (Thuthung Lui Hun) ah chun Vaihawmtute, Thiampute, Lengte haw â ding ah pawimaw diak, a nei ngêi uh ngâi hi in a hiatthei hi. Hotu khat hi ngâl ah pilna neilo kiti chu Pathian in a sukmuualpho guat him him, a nutsia, a ngaisak utlo him him genna tuk a hi. Kochuam puitu - Pastor leh Kochuam Upate lak ah mi pil diak, lem he diak i um uh ngâi a hi. Mipi vantang in a ngaitua leh hetthiamna khel lam pek ngaitua ah, lemguatna thiam tak nei thei di mi i um uh ngâi a hi. "Mi'n le ziagual chun a bawl sek u'i" ti ah bawl ve thei, kaihuaina bu entawn/zui thei haw hilo, kaihuaina bu khel lam ah lemhiatna nei mi, lungthim ngaituana seng pei, Kochuam phatna di ngaitua tak tak pei, mi'n a pâkchât leh pâkchatlo ah buailo, sunggil lam ah mi tak (Sam 51: 6) i um uh ngâi a hi. Ziagual mi chu zân khat thu ah hung um phut ziang ding in kinep a um pua, kum bangzat a h'em hung thuak ah, hung

kizil ah, hung ngaituate lak
ah kipat hung um di a hi
(Dan 4:6, Job 28, Tpl.1:7).
I kiang i kîm ah mite tawh
kikâl â ding ah lemhiatna
nei, mipi vantang puihuai
didan lem hia, Kochuam
puitute tawsawt didan
ah lem hia, pil tak ah mâ
lâkna di ngaitua thei, mi pil
i mamaw u’i. Bang h’em ti
ah thu lamdang deu khat a
um cheng leh kuate a h’em
i va dawt zel ah, mi’n lem ei
guatpiak zel di a hileh chu
mi khut ah kinga kihi zing
di tina a hi zia in, thukhen
ahiloleh malakna di thute
ah i kitodel uh a pawimaw
ah, pilna lam ah i kitodel uh
a ngâi hi.

3. Sum leh Pâi lam ah.

Kitodelna ding ah thil
pawimaw dang pakhat i
hiatsa chiat uh chu sum leh
pâi ah kitodel a hi. Midang
sum manglo ah nasepna
i chiapiu ah, mâ i lak ua,
mâ i sawn uh ngâi a hi.
Kuate a h’em panpina ah
kinga, eima tuakkhawmsa
sum hilo, midang sum
mang ah nasem i hui chun
i thuneinau um pua’ntin,
banggual in kigên pâwm
in, kiletsak leuhin le mi

ei hechiente’n bangma ei
ngâilo di a hui. Sum leh pâi
ah kitodel theina ding ah
pawimaw chu i mu kham
kham hawptuakdan thiam
ah, kilen tak ah matdan
thiam a pawimaw masa
pen hi. Lam diklo ah sum
tam tak huailut guatlo ah,
gim leh chawl tak ah, dik
tak ah lawdaw guat zawk
di a hi. Kuate a h’em chun
bailam tak ah panpina
ahiloleh bang bang a h’em
siamna di sum deldawk
dawk ziang thei le um kha
na’na, hilehle ziate nung
chu zuilo ngam in, “Pathian
gam leh a felna hawl masa”
ngam phawt leuhin Lalpa’n
i sepgimnau chu a thawn in
umsaklo di a hi.

Kitodelna ding ah pawimaw
lampi tamlocha i vak gen ah,
ziate tilo hile lampi dang tam
tak um ngei ina. Hilehle a
khaikhawmna ding ah chun
Laodikea Kochuamte vauhilna
thu kha he zing hitin, bangkim
ah Pathian muang in, Pathian
ah kinga in kalsuan leuhin
mani kitodel chu kihi mai di
a hi. Pathian tilo thildang ah i
kingak ni nui chu a kitodello, a
buai di chu i hi ngal u’i ti hezing
hitui.

KHANGLAITE LEH SEX

~ Upa Dr. Soilalsiam
Lingsiphai

‘Mi zosia’n kichênna hi zâu henla, zâlkhun le sukbuak hi kîhen; tasualte leh ângkawmte chu Pathian in vâihawm piak di a hi’. (Heb 13:4)

Sex ti thumal ziang hin le ngaituana a sukha! Ei uh thingtang mite lak ah hin sex chungchang gen hi kisanla-um leh thil bailam a hi pua; a diak in chate holimpi hi a haks a diak hi. Dawtna nuamlo tak tak dawn thei leh mualpho thei a hi zia k in, Nu leh Pa tamzawte’n a chateu in a hung hetthiam ziang ding un a kaw i mai ui. Ahin, sex hi khawvel pumpi kigen zing a hia, khanglaite la naupang kitlo di a hi zia k un, a bit thei di pen ah hil a pawimaw hi. Pitingte’n i hillo uh chun, a lawiteu ah kipat zil tho tho di a hui.

Chanchin da-um ma ma chu, Khristian khanglai tamtak in kichên masang leh kichênna pawlam ah sex mat hi a pawmzam tâk uh hi a hi. A diklona he maleu, khanglai tamzawte’n, sex ah thiantho di hi ngaidan lui (*out-dated*) in a kaw i tau. ‘Khatvei bep kidam a, hinkhua hi a nuam theipen ah mat di a hi’ ti hi khawvel ngaidan, khanglaite zo ma ma chu a hi. Tuhun ah khawvel in kilungsiatna leh

sex a chiapidan hin Khristian khanglai tamtak a thunun a, umchan pha leh dik susia in, a sângtha hiai hiai tai.

Gingtu khat in a thil ginchâk leh thilphâ’ a pawm chu, a ginchâk zia k leh thilpha a hi zia k a hetlo chun, a ginna chu suksi a t a hi ta’i, tina a hi. Hun chiasate sâng in, tuhun ah hin, Pathian thu tawh kituak ah, sex chungchang kizilsak a pawimaw diak in a kilang

hi. 'Sex hi kichêna masang leh pawlam ah matlo di a hi' ti hi khau talua a hi ta diam? A dawnhuna phapen chu, Pathian thu'n banggual in a gen em? ti a hi.

1. Sex hi gîtlo a hi em?

Pathian thu - Bible in sex chungchang hi kichian tak in a gen hi. 1 Th 4:3-7 ah chun, *'La thiantho ua, tatsual la kisûm uh hi Pathian lunglam a hi... thiangtho ding in ei ko zaw a hi'* ti'n a gen hi. Pathian guat gual ah sex in umzia a neina ding ah chun, kichêna thutiam tawh mat di a hi. Chun, kilungsiatna leh sex chungchang ah kipuihuaina Dan leh gamgi kichian tak in ei siam piak hi. A dan leh thupiakte hi mihingte phatna di a hi. (Dan 10:12-15)

Sex hi Pathian lemguat a hia, gîtlo a hi pua; matdan a diklo chun, gîtlo a hi sek zaw'i. Thiangtho tak ah kichêna tawh chiakhawm ding ah guat a hidan chu:

- A tîl in Pathian in mihing - numei leh pawsal in a siam hi. (Thl 1:27)
- Pathian in mihing masa Adam leh Evi, zi leh pawsal in - zia chu 'taksa khat', pumkhat in a siam hi. (Thl 2:24)
- Khawvel zosia luasuak ding ah kisupung di'n, A malzawl a; zia umzia chu, 'kichêna hin sex a kengkhawm hi' tina a hi.
- Kichêna leh sex hi a za-um di a hi (Heb 13:4)

Zia zia chun, mânimasial leh diklo tak ah sex mat hin thumatlona leh gitlona a suak sak sek hi. Pathian in sex hi a huntak a - kichenna tawh mang ding in ei hil hi. Kichenna masang chu a hun a hilo zia in, thutiam a-um pua, a diklo tina a hi. Khanglaite'n het ngei ngei di chu Pathian a pha, zi leh pawsal â ding ah thilpiak lopi leh thil hithei - sex hi a siampiak a hi. Zia hin

HINNA VÂK

mihingte thilpha tamtak
tut ding ah guat ahi lai
in, mang diklote chung in
siatna tamtak a tut sek hi.

2. Sex hi mi pani kâl ah thuthung a hi

Bible ah hin thuthung
chuam chuam muthei a
hia - Pathian leh Abraham
kâl ah thuthung, Jesu
thuthung thak - Lalpa
Zân an Sacrament-te leh
a dang dang. Zia gual tho
hin, sex hi nû-pân kâl ah,
damsung ah ginum ding
ah thuthung hetzingna
a hi. Zia zia a chun,
kichen masang ah sex leh
kichenna pawlam ah sex
mat chu Pathian zâlona a
hia, a-gâ a hawi ngai puai.

Leng David in
Bathsheba âng a-kawm a,
Lot in a chanute a luppi a;
Samson in a gâl numeite
a luppi a; zia zosia hin
gapha a sualodan leh
Pathian lunglam a hi puai,
ti chu Bible in kichian tak
in i mu'û. Kitiamna leh
Thuthung bawsiat chu
Pathian in a dawilo bân in,
mihing inle a kidawi puai.

Zia bep chu hilo in, sex hi
kichengte kânkhawmtu
matchâk pawimaw tak le
a hi.

3. Sex, Thiangtho ah kawi di a hi

Zil mite suidan ah kipat
in Khristian tamtak in sex
hi diklo tak leh a hunlo
in mat a hidan hetthei a
hi. USA gam ah kumkhat
ah nau kisutha chu
12,00,000 vel a hia, zia
lak ah 64% hi Khristian a
hiu. Khawvel mun chuam
chuam leh ei gam ziang
inle, kichên masang ah
sex leh kichênna pawlam
ah sex mat hi, thil thak leh
lamdang a hi pua, a tam
hi ti hetthei di'n a hung
kilangdawk sek hi.

Pathian in sex
hi mihingte kithâ-
punna di leh kichêngte
kizawpmatna suhâttu
ding ah ei piak a hia, zia
thil phatak leh thiangtho
hi sukbuaklo di a hi.
Khanglaite'n sex utna hi
hât ma ma leh le, 'sex
matlo zia ah thi a-um
puai' ti hia'n, thunun guat

tei tei di a hi. Diklo ah sex mang i um tâk un le, kisîk in, haisan hitiu. Jesu'n numei ângkawmnu kiang in *"chia'n la gilo kit ta kin"* (Joh 8:2-11) a la tia; zia thu hi, ei uh kiang inle a gen a hi. Khawvel in nasatak in sex hi, thil chuam chuam mangcha'n, thêthâng zing maleh, Jesu hepina zia ah Pathian Lalgam luatu dite i hinau kihemillo a, sex hi sukbuaklo di a hi.

4. Kichênna pawlam ah Sex mat in kipâkna a lamang hi

Khawvel ah kipakna leh lungawina hi mihingte dawipen a hia, zia thil mûna ding in theitawp i sua sek ui. A hin, kipâkna hing ei petheitu chu Lal Jesu a hi. Zia kipâkna hi a hunlo leh diklo ah sex matna in a lamang a, Pathian guatpiak hinkhua chu nuamlo tak in a mat khawlaw sek ui. Diklo ah sex mat hi nuam diak di leh kipak-um ding ah ngaituana hi thepna mai a hia, kipak malak sâng ah kipakna thattu a hi. Sex diklo tak ah a mat zia ah

David thil tuak leh kisîkna, *"La hukdam limna ei pe kit in"* (Sam 51:12) tia, kisîk kawm ah Pathian a dawt kha!

Pathian lemguat kawppi neina ding in Thagau Thiangtho puina a pawimaw a, zia chu setan in suksiat leh gûkmang a tup zing hi. Kichên ma leh kichênna pawlam ah sex mat phatlodân hi zilmite leh a-tuakte'n a hechian ma mau. Zia zia chun, 'Diklo ah sex mat hi kipakna a hi pua, kipakna ei gûkmang piaktu a hi' ti hi khanglaite'n gingla puai tiu.

5. Ngâk thei a hi

Khawvel in dupdal tak ah sex mat khawksalo maleh, gingtute chun kichênna lo ah mat-thânghuai di a hi puai. Pathian thupiak a hia, malzawlina dawnna ding in a thupiak mat a pawimaw hi.

Khanglaite'n ngaizawng (dawngmâ) nei di phat leh Pathian lau mi - thiangtho tak ah kichênpi thei di

HINNA VÂK

mi nei guat di a hi. Chun, kingaizawn lai ah hun matkhawm tam tâkluat kivên di a hi. Pathian thu'n khanglaite kichên masang ah sex manglo di'a a dawî zia khenkhatte chu:

1) *Pathian vaihawmna ah kipat vênbit hina*

Kichên masang ah sex matlo di zia klianpen chu - Pathian thupiak a hi zia k a hi. A zia tamtak um maleh Thu Sawm Piak pasagi na ah "Angkawm kin" (Pdt 20:14; Dan 5:18) a ti hi, mihingte phatna di'n a huntaw k hi. Zia umzia hi kichênna mang-ah, i kawppi bep tawh sex mat di tina a hi. Heb 15:4 ah chun, "Kichênna hi zâ in um henla, zâlkhun le sukbuak hi kihen, Pathian chun ângkawmte chu vaihawm piak di a hi" a ti a hi. Vaihawmna maitua di i hi zia k un, Pathian thupiak mat chu vênbit hina (vênbit ah umna) a hi.

2) *Ngaituana vênphat*

Mithiamte'n, 'sex matna ah tibâk pawimaw pen chu ngaituana lungthim a hi' a tiu. Mi dang dang sex matdan têkhin/bûktua (*compare*) di ngaituana lunggel hi, setan ah pat a hia; kichên masang ah sex a la mangte chun, zia ngaituana chu a nei sek ua, a lim thei ngai puau. Zia ngaituana hin nû-pan kâl ah sex le a sukha, hisello leh a hi di gual tak, a tungzo ngai sek puai. Zia gual ah mi chuam chuam tekhn/bûktua ûtna lungthim hi, Pathian dawilo lamtak a hi bân in, thil lau-um, kichên hinkhua ah haksatna tuttu a hi.

3) *Ginlana ah kipat Bitna leh Muanngamna petu*

Nû-pan hinkhua sunuamtu leh lawtin theina dîng ah pawimaw pen chu kimuanngamna a hi. Kichên masang ah

sex a la mangte chun zia muanngamna chu bangchan hem in, a tasam (a vât) deu sek ui. Pawsal ahiloleh zî in, ‘a kawppi chu thiangtho a hi, kichên masang ah sex manglo a hi’, ti a hêt chun, nû-pan kimuanngamna a suhat a, lungawina a neisak hi. Nû-pan hinkhua matto zelna’n le, zia muanngamna chu a pawimaw to pek hi.

Kichên hinkhua hi damsung dai a hi zia in, Pathian dawidan zui a, thiangtho tak ah kichêngte chu a bulphû (*foundation*) a det tei sek hi. Tulai diak diak hi, sex mat zia ah kikaisawn natna (*Sexually Transmitted Diseases, STD*) a tam deu deu bep hilo in, a kithêdal hât ma ma nalai

hi. Zia lak ah hin Pathian in gingtute ei vengbit nuam a, Ama thu mang ah, kivawp thiangthote chun, muang tak leh limtak in nû-pan hinkhua mang thei di a hiu.

A chaina ding in, khanglai - hung khangdawk limte, sex chungchang zilsak di leh hetthiam sak a, kivawp thiangtho ding ah dawitêlna pha siamthei sak ding in, Nu leh Pa te i kichial hi. A mau in a hung kizildaw mai ding un kawi puai tiu. Zia hitheina ding ah pawimaw chu chate tawh hun matkhawm tam, kinêlpi a, a lungthim gen ngamnau ah um a pawimaw takzet hi. Gamgî hethiam di leh a dawitêlnau Pathian thu tawh kituak ah mang thei ding ah zilsak di a hia; a haksatnau zosia a tut theina ding ua, kihawn di a hi.

“Thilpha la bawlthei taphawt chu bawl in, kawng bangkim in, mun zosia’n, hun tin in, mi zosia kiang in, la theina a um laisia’n”

~ John Wesley

KHRISTIAN CHAWNDAN LEH PUPA CHAWNDAN

~ Rev. Ph. Thianneilal Vaiphei
i/c Delhi Kochuam

*Dân um lona chun bawsiatnale a um pua'n, dân chu
lungnatna supuang bep a hi zawi (Rom 4:15). 'Dân chu
Thagau lam thil ahi ti i hiau ah, himaleh, keima hi taksa mi,
gitlona nuai ah khawtdawsa ka la hi tai (Rom 7:14).*

Thumapui: I thupiu hi a zâu talua gen kim vek di hilehin lekhabu lian tak leh sâpi ah zik ngai hial ding a hi. Amabo chu chawmkim tak ah gen ding i hi ziaak un thupi genthiam haksa tak a hi ziaak in a kimlo lai um ngei ding a hia, zia chu midang inle hunkit tak leh a hun sutzawp zel ding in kawi hitiu. Chawndân kiti chu mi hawnkhat in hindan pha neina ding ah ginna (*beliefs*), ngaisan (*values*), kivaihawmna leh kivâkna nasep dan kibang a neite genna a hi deu tângpi hi. Zia chu mimal hindan leh ngaidan hilo in, suantu masate ah kipat hung kilasawn hindan, hetna, khutthiam (*art*),

ngaidan (*morals*), kikaihuai dân leh hidan pangaite a huap vek hi. Chawndân itiu hi pianpi leh taksa bekden (innate) a hi diak pua i umnau society ah kipat i zildaw leh i hetdawte a hi. Khristian chawndân kiti hile Pathian dawidan ah hinkhua i mat theina ding ah Bible tawh kituak ah umdan pha, ngaidan hisel, kikaihuaina dân leh thilhi dân pha kibang tâng tak ah i neiteu hi a hi. Mihing i hiziak un Khristian chiat chiat hile a gam gam ah thilhi dante a kibang sip sip pua, sap gamte chawndân (*western culture*) tawh India Khristiante chawndân hile a kibang puai.

Chawndân leh Dân him him ngaikhawk mi chu khua leh tui pha a hui. Aizawl Theological College ah BD ka zil lai in thesis topic in, *“A Theological critique on Vaiphei Customary Laws and Practices in the light of the Bible,”* ti ka la zik a, lunglut um tak a hia, maleh suichian di a tam a, thumal mat di zat a tawm zia in tampi suichian manlo in ka ban ah research ten a hun sutzawp ding un laklaw deu tak in a tawpna ka la siam a, itchâk um kasa ma ma hi. Tuhin le Thupi pani suikhawm di i hi zia un a chawmkim thei pen ah gen kit ngai di a hia, kimlo di hi lehle a pawimaw leh a khaikhawmna tângpi vak gen tha zung zung mai hitiu.

Khristian Chawndân leh Pupa Chawndân tekhinna

a) Ginna (*belief*): Khristian Chawndân ah Pathian hing, Israel Pathian, thil zosia siamtu, eimau le ei siamtu bep chu gin di a hi. Pathian dang ho leh biak chu phal a hi pua, hansia lawna a hizawi. Pupa

chawndan ah chun vang lau di a tam ma ma zia in gin leh biak ding - thing leh suang mêlput dan mak deute, tuiva-mit te, thing-gawphel te, leikaw-suangkaw mak deute chu vangsiatna/vangphatna ei pia thei gual ah ngaina nei in biak leh suklungawi ding a tam ma ma a, tichun, a kithawini phat uh lele hetlo pathian â ding natiang in chanvo a siam piak sek ui. Khristiante chun thinung thagau lam tiang ah kumtuang hinna nei ding i hi dan uh ginna i nei gual un, Pupa chawndan a khan le mithi khua um a gingchau a, nêk ding leh sil leh chên ding a la kipuak sak sek ui.

b) Moral Law: Pha, Phalo; Dik, Diklo chungchang ah kikaihuaina dân chu Khristiante’n Bible ah kizikte leh gingtu masate chawndân (*tradition*) zui in siam a hia, zia chu kochuam mipite’n zui vek ding in kiziltilna nei a hi sek hi. A zui lo leh dân bawtsiate chu thunun

HINNA VÂK

a hi sek a; a thil hi dân dungzui in tha 6 thunun, kum 2/3 thunun tite a hi sek ua, simna dik tak nei ah Pathian a bel zing ah, kochuamte a chung ah a lungawi chun laklutna nei a hikite sek ui. Ginna diklo neiahi chun vang kochuam ah kipat nawdawk a hi sek ui. Ziagual ma chun Pupa chawndan inle dân bawtsiate chu a thilhi teu tawh kigûn in, vawkpi salam, sialpi salam sât sak a hiloleh khua kipat nawdawk tite bawl a hi sek hi. Dân hi phatna ding ah siam a hia, mi phalote â ding in dân hi ningtel um tak a hi. Dân zui peilo phun phun i um khâk uh chun kingaitua hun a hi.

c) Ceremonial Law: Sêl leh sâng bawl chungchang ah hin khristian chawndan in Pathian hopina chang thiampu, jawlnei, ahiloleh Kochuam in a têt/a guat Pastor, Upate leh Sawlchâkte chanvo a hi deu a, bangkim chu Pathian min lam in, Ama lopina ding ah bawl a hi

sek hi. Pupa chawndan in vang dân-thiampute chu kithawi-kimútna zosia'n a pang ua, bangkim chu Chungmangpa leh Nuaimangpa min leh suantu pute leh pusawnte min lam ah bawl a hi sek hi.

d) Social Life: Khristian khawtâng hinkhua chu Bible ah Dik, diklo, pha leh phalo (*moral laws*) dân kizikte zui ah hinkhua pha leh dik mang ding ah kizilti a hi. Pupa chawndan in vang khawtâng hinkhua chu pipu chawndan (*custom & tradition*) zui ah hinkhua kimang sek a hi. Bible chun invengte hepi tak leh kihethiam tua tak ah chengkhawm ding in ei hil a, pu leh pate khan le 'Invengte tawh kido sang in khuapi 7 tawh kido a nawp zawi a tiu hi. Zuau gen, gúkchât, awchat leh du-âmnete hi kuama'n neilo ding in Bible in ei hil hi (Pdt 20:1-21). Tulai hin a gúk ah gam leh Inmun khangthei neite a um sek ah khawtâng hindan pha

chu a subuak nasa ma ma hi. Bible in, 'A piatu chun lukhawng a nei zawi,' a tia (Nas 20:35); pupate hindan inle 'mi paipêk ah anche tawm i het chun eima paipêk inle a kiheng sek hi,' ti'n thilpha bawl a ual ma ma ui. Bible in meithâi, nauchaga leh gentheite ngaisaklo ah kawilo di thu ei hil a (Dan 10:18), pupa chawndan inle meithaite chu a In ding sak piak, a lo ding siam piak tite; nauchagate lungsiat ding tite kihilna a la hi sek hi. Bible in 'mi'n la chung ah bawl leh la ti gual gual ah chun mi chung inle bawl in,' a ti (Mat 7:12) gual in pupate hunlai a khan kipanpituana lam hi a ngai thutak ma mau ua, lampi khuam kikawite put piak, lo thaw zo hakte thaw hu, bu haute va puakpi, natna khiltak neite loma thaw piak, haksate panpi tite a la bawl sek ui. Chuleh, mi thabei leh sepdan thiamlote chule lawmpi (*hausa te â*), lawm neu (*mi nautangte â*) a la siam

ua nasep dân a la zilti sek uh a hi. A haksa deu ten a chanaute tiamkhawm in a sep lelte sem ding in a chial un a mi tiamte chu nitak an a nêkpi sek bawk ui.

e) Values: Khristiante thil ngaisânte chu - Huangphalna (Tpl 22:9), Hangsanna (Jos 1:9), Hepina (Joh 3:16), Zabawl (1 Pe 2:17), Kinepna (Tpl 23:18), Chamna (Joh 16:33), Ginna (2 Ko 5:7), Ngaidamna (Eph 4:32), Thawkhatna (2 Ti 2:12) leh Lainatna/lungsiatna (Kol 3:12) tite a hi. Maleh, Pupa chawndan ah a la ngaisân pen uh chu Sakap thiam/tam, Bu nei tam, gâl-hâng leh mi thahat tite a hi. Sa kap tampen leh Bu hau pen pen ten "Sa-ài; Bu-ài" a la bawl sek ua, zia chu mi chungchuang hina a hia, min a la ngaisang ma ma sek ui.

f) Kichen: Khristian chawndan ah chun kichenna hi numei leh pawsal hepina thiangtho ah kihepi leh kilungsiat

HINNA VÂK

ah na kissepiaktua ah Khristian sungkuan siam ding ah Kochuam dân gual leh nu leh pate kithugual ah pumkhat ah kisiam chu “Kicheng” ti a hi. Pupa chawndan ah chun nu leh pate kithugual ah nupa ah kisiam chu “Chawng Mo ah Kicheng” ti a hi. Ziagual chu kichenna dan himaleh Khristian chawndan leh Pupa chawndan zuilo ah kigû, kijammangpi ah kichenna bulpan le mi tamtak a um zing zel tho hi.

Khristian chawndan leh Pupa chawndan khi theilo a hi

Khristian chawndan leh Pupa chawndan i tiu hi chengkhat pum chunglam leh nuailam khi theilo gual hi a hi. Pathian in Abraham kha a ko a, ginna leh Pathian biakna lam tilo chu amau chawndan in a pui mai a hi. Chuti a hi zia in ei unle Pathian i biak nau leh sel-leh-sang thu ti lo thil dang ah i kilungtuak ua, tu leh be, u-leh-nau kingaina tak ah sakhua i túkchak

theina dingun i chawndân ua sakhua hi i kilâklutu (*inculturation*) a ngai hi. Pupa chawndân ah Dân dik leh pha (*moral laws*) hawi tak tak a la neiteu hi sutzawp zel a, sukchankang to zel a phai. Pathian hin le nam hi a ngaina in a pawm tho hi in a kilang hi. Israelte bang chu nam piting in a siam a, a panpi bîk a, a chawndan uh le a pawm piak ta mai hi in a kilang hi. Ei uh nam hile Pathian siam tho a hia, ei un i kingainat thiam ua, i chawndân teu i kihepi bawl ua a hi chun Pathian nei nam, Pathian in a panpi leh a chawisan nam hi mai ding ihu hi. Israelte chu nam ngainate ahiu ua, a pau uh a ngaisang ua, a chawndan uh a ngaisang bawk ua, tichun Pathian a nei bawk ua a khangto mai uh a hi. Ei un le i pau uh hi ngaisang thak hitiu. Lekha thiamten le ei pau ngei in thugil tak tak gen thei gua hitiu. Tu leh cha i nei tiang un i pau uh, i chawndan uh zilti zel hitiu. Chutilo chun kum 20 vel sung in i pau uh mangthai ziang di a hi. A diak in khawpi sung (Delhi, Bengaluru,

Guwahati, Calcutta, etc) ah chengte'n pan nasa zaw'n lathak hitiu. Pau neilo i hung hi ngei ngei uh leh mi tawden nam, chawndan mumal neilo nam chek-chau hi mai ding ihiu. Sapte, French-te, Judate, German-te thugen TV leh Internet mang ah i et phat leh awchat a um sek ta ngei ui. Amau pau ngei in thugil mi hetpi theilo khawp ah gil a gendawk zawl zawl thei ua, eimite chu Zillai Conference vel ah hin le ei pau thaw theilo le i um ua, ziate chun i chi leh nam damna ding ah thugûk leh thupil a gendaw di chu kinep umlo hial a hi ziak in beidawn a um ma ma hi. I suanteu (*next generation*) chung ah beidawnna um panta a hi chun i malam uh hi a thim pan ta tina a hi thei hi. Theology lam inle nam chankang i titeu khun amau pau ngei in thugil hi a he zawu a, a pau uh khu English in a hilchian zaw sek uh a hi. BD leh M. Th ka zilnau inle English pau hilo technical term tampi mat a hia, i pau kimat thiam

a lopi zia ka hedawk diak sek hi. Ka thesis leh assignment zikna'n le Vaiphei pau ka mang sek a, Grik leh Hebrai pau kimangte gual tho in english in kahilchian sek hi. Pathian in pau hawitak leh chawndân bîk nei nam in ei siam a, talent khat kipia vuimang pa gual ah i pau uh tawmcha hi sukpun sang ah sap pau leh kawl pau lak ah i vuimang ziang uh chun "Pau leh Nam" ei piatu Pathian hi a kipâk diam? Ngaitua veng veng hitin uh, i chi leh nam ngainat kizil pan ngal hitiu.

Thuthawpna: Khristian chawndan ah chawn di chu Khristiante a hiu a; ziagual ma chun Pupa chawndan ah chawn di chu ei uh a suante – a tu leh chateu hi i hiu. Chuti a hileh chawndan kengtu pen "Nu Pau - Mother Tongue" i thiamlo chun chawndan zosia zuikim i hi diu taksan a um puai. I nam humbittu hiding in Pathian hetna tawh theitawp sua hitiu.

KHAWVEL IN JESU A MAMAW HI

~ *Upa Lalminsang*
Hill-Town

Mihingte'n khawvel ah pawimaw i sak leh mamaw hi ah i hiat thilteu a kibang suak pua, lunggel dante, lungput dante leh mizia dungzui in gel pawimawte le a chuam sek hi. Zia hi zia kha a pawimawpen hi ti ziang thei a hipua, mimal tinte'n mamaw hi ah a kihiat uh chu amau â ding in a mamawpen uh a hi a ti thei mai hi. Mi khenkhat in damtheina a gel pawimawpen lai in khen khatte'n sum leh pai, nei leh lam a gel pawimawpenu'i. Khawvel damsung hun chawmcha ah buaina lianpen chu zing leh thâi ah bang ka ti zêl diam ti ah malam di khualna leh ngaituana ngen a hi ti leu hin dik thei tho ina. Mani damsung khawsakna di leh Tu leh chate khualna zia in theitawp sua in Nu leh pate'n na a semua, zia gual ma chun tu leh chate'n le a tu leh chateu tiang â di khualna zia in a sepgimnau chu chawlsan thei diak pua'nau a ti thei hi!

Tulai khawvel masawwna hat tak leh changkang zel hin Pathian mamaw hi ah kihiatna kiamsak deu deu hileh a kilawm hi. Sum leh pai mamawna a sang deu deu ah, zia chu khawvel ah dam khawsuakna ding ah pawimawpen hi in a kilang hi. Damsung lopina lêmte'n mihing thinlung lua dim in zia lam chu mamawpen hi ah kihia'n, khawvel a phe veng vung zing hi. In leh lo thupi leh lopi tak takte, lalna

leh thuneinate hawl in Pathian be manlo, Kochuam ngaisak manlo leh kikhawm manlo zen ah buaipi di a tamta ma ma hi. "Tu lai chu ka buai talua, ka kikhawm man pua..." ti ah thil ngai pawimaw di leh buaipi di a tam tiat tiatta, zia hi ngai pawimaw dan dik a hi diam ti hivâng ngaitua thak a pawimaw hi. Bible sim manna di hun nei talo, pauchapna hun ziang di le hun nei man talo khawp ah buaipi di thil a umta! Khawvel

hin a mamaw chu kiningting tak ah khawsak theinate, a sang ah lopizaw leh hawizaw ah masawnto zelnate hih hi in a lang ah, zia chu del in mitinte'n buaipipen a hi. Khawvel â ding in lo theilo le hi ngei ina. Zia chu a hi zinglai in Gingtu tamtakte'n Pathian ngaisak manlo ah khawvel mitmu ah thil lopite gel pawimaw zawk a hita, 'khawvel ah um nalai a kihia' ti ah kithep lungawi zêl hi in a lang hi. Pathian thutak ngaisakna sang in minphatnate, khawvel mit ah thil kilawmte gel pawimaw zawkna khawvel a hi ta mai hi.

1. Khawvel a thawmhau hi:

Khawvel a hausa deu deu ah, Sum leh pai a tam deu deu ah, khawvel ah nawpchen di thil a tam deu deu hi. Inchên khawsak a bailam deu deu ah, thil thak, changkangzaw siamdaw leh mudaw a hi zêl ah, thil zosia hi hung bailam zaw deu deu nalai ding in a ngai thei hi. Maleh ziate chun mihing lungthim ah thawmhauna a subei thei diak pua, dawikhawpna a pe thei pua, dawina a kim thei diak pua'i. Mihing ah hin lungthim thawmhauna khat

a um zing sek ah, khawvel ah taksap neilo di khawp ah kilang mi hausate haw'nle lungthim thawmhau gukna a neiuu, khawvel ah mi minthang tak takte'n le zia thawmhau gukna chu a neu'i. Mi mitmu ah lim melpu, mipi lak ah nui melpu zing mi tamtakte lunggil sung ah bîlona a um sek hi. Khawvel ah hin kipakna bukim, limna bukim a um pua, mihing thinlung sung lungkimna hi lalna, thuneina, hausakna leh minthannate hin a pe thei pua, mu gual ah kigêlna tiang bep a pe thei hi.

2. Lal Jesu bep in lungkimna leh thamuanna a pe thei hi.

Mihing hinkhua hi Lal Jesu panglo in a lim thei pua, khawvel thilte hin limna tak a pe thei pua, khawvel hausaknate hi lunggimna leh buaina belaptu mai a hi sek hi. Banggual in hausa'n, minthang in thuneina nei maleh Lal Jesu panglo in limna tak leh thamuanna tak a um thei pua'i. Hausakna, minthanna, lalna leh thuneina a sangpo leh

HINNA VÂK

lunggimna leh buaina a sang zêl hi. La phuaktu'n "Khrista beplo chu kuama dang kipakna a um pua'i" a ti hi dikto zel di a hi. Number zero (0) chu bangma a hi pua, 00, 000, 0000... zero tamtak in le lulna bangma a nei pua, maleh zero masang ah number khat (1) a um leh zero a tampo leh a lulna a san gual in hausakna, minthanna leh lalnate hi Lal Jesu bep tawh lulna a nei ah, limna leh kipakna a chang thei bep hi. Khawvel nawpchen gawtu chun dawikhawp tak ah chên manlo in a vanglai, hât hun laitak in khawvel a beisan ta sek hi ti khanglai tamtakte hinkhua'n a mu thei hi. Sum leh pai hausakna tawh khawvel nawpchen gawtu chun a dawikhawp mu manlo leh khawvel thala tak kawm ah a thilneite a nutsiasan sek hi. Lal Jesu neitute bep in lungkimna a nei hi.

- 3. Dawitâwk tak ah khawvel nawpchentü chu Pathian ngaisak, Pathian mite a hui.** Bukimlo khawvel a hia,

genthei haksat tuaklo theilo hun a um hi. Pathian mite chun bang hun inle limna di a mu thei sekua, bang gual hun ah le kipak dan a thiamua, Lal Jesu zâl in khawvel a nawpchen thei uh a hi. Lal Jesu panglo ah khawvel nawpchen gawtu chun vâng chawldamna mu manlo in khawvel a nutsia san sek ah, Pathian mite'n a hileh damsung khawvel khêllam tiang in chawldamna a mu seku'i. Lal Jesu'n ama kam ngei in "A gam leh a dikna chu hawl masa tau in, zia thil zosia chu le piak belap in um inlau" (Mat 6:33) a ti gual in Pathian ngaisaktu, Pathian mite'n Hukdam a hina khêllam un damsung khawvel ah hin a belapna a changua, a bukim chu kumtuang ah chang nailai di a hui.

Khawvel in a mamaw lungawina, lungmuanna, limna, kipaknate a chan theina ding in Lal Jesu a mamaw ah, Lal Jesu neilo ah a belapna bep in a lungkim thei pua, a tak Lal Jesu chu khawvel mamaw a hi.

MUTHEILO PATHIAN MU SEK A NGAI HI

(Hebrai 11:27c)

~ Evan Jamkhawpau
Lingsiphai

“Mutheilo Pathian chu a mu ziak in, a thuak ham ham hi”

Pathian hi chi tampi a um a hi. I pu, i pate chun Thingbul pathian, sungbul pathian a la tiu ah, thinglubui po, thing gawphel po, tuivamit po, sâmpfal po a la ho sek uh a hi. Ningkum (2024) i Sunday School uh Zillai 17-na ah khanle, pathian chi chuam chuam (*Nisa pathian, Tha pathian, Aksi pathian, Tui pathian, Hui pathian, Tang leh Luite pathian, Bu leh Bal pathian, chiphatna pathian-te haw*) um ah a ngai thu’u i la zil ua. Chuleh, Sawlchakte hunlai ah khanle, pathian chuam chuam um ah a ngai ziak un, a ho khaklo uh a um khak ding lau in a hiatlo uh pathian â ding tiang inle “Hiatlo pathian kiang ah” ti’n thilpiak a la lân uh a hi (Nas 17:23). Chun, Israelte ngei khanle Mosi’n thusawmpiak a va lak kê ah khan Sana Bawngno lim a la siam ua, pathian in a la ho uh a hi kha (Pdt 32:4).

Zia muthei pathian (Mihing lim, Ganhing lim) haw hin mit nei maleu a muthei diak puau a, Bil nei maleu a hethei diak puau a, Kam nei maleu bangma a gen thei diak puau hi. Ei haw Pathian (mutheilo Pathian) hi chu bangkim hesuak, bangkim musuak leh bangkim bawlthei, i lungdawn lai ah le ei panpi vak ziang ding ah i kiang ua um zing sek a hi. Himaleh, zia chu i mu seklo ziak un, i bawlllo ding ding i la bawl kha sek ua,

i neklo ding ding i la nekha sek ua, i genlo ding ding i la gen kha sek uh a hi. Ziaziakchun, mutheilo Pathian hi i mu sek ding uh pawimaw a hi.

Aleh, mutheilo Pathian chu bang gual a mu ding a hi diam? Ti hi vak ngaitua kit hitiu. Pathian nei mi Scientist minthang tak mai khat chun, “Ka Telescope ah van lam ka et phat takleh, Aksite umna tiang bep ka mu pha sek in, khupdin ah ka pauchap phat

HINNA VÂK

tak leh Aksite khêl lam pek ah Pathian leh a Lalchutpha ka vak mu pha sek hi” a ti a hi. Mutheilo Pathian chu i taksa mit a hi mu ding ei pua, ginna Thagau mit ah mu ding ngai a hi. Lalsangzuali Sailo in a La phuakpakhat chun “Ka singmit khua fiahlo mahse, thlarau mit in a fiah chhandamtu” a la tia. I taksa mit in mu theilo maleh i Thagau/ginna mit in i mu zing ding uh a kûl a hi.

Bang hun leh mutheilo Pathian chu i mu a pawimaw sek em? Mutheilo Pathian i vak mu sek ding a pawimaw hun bîk hi a um deu sek a hi.

1. I lungnat hun laitak leh mutheilo Pathian chu i vak mu sek ding uh a pawimaw diak sek a hi. I lungnat phat takleh a ngawl kibang ziang sek ahia, i gen ding kilawm leh kilawmlo le kihe ta seklo, i bawl ding kilawm leh kilawmlo le kihe ta seklo a hi. Ziakiakchun, i lungnat laitak leh mutheilo Pathian lam enlo a, i ut ut i vaidawk ziang takleh, a la ngaite (i hosiatte) â ding ah khan thawk zaw ding gual hita seklo a hi. Damsung ah le hetmil thei taklo ding tiang tiang le a la kivaiddawk ziang

thei sek a hi. Ziakiakchun, i lungnat hun phat takleh mutheilo Pathian hi i vak mu sek ding uh a pawimaw diak a hi. Juda chang 9 na i et leh, Vansawlichak chungnungpen Mikael kha Diabol tawh Mosi luang a kichunau thu a kimu a hi. Mikael chule lungna ma ma ziang tho dan a hi. Himaleh mutheilo Pathian kha a vak mu zia in kampau phalo sua in a hose nuam pua, “Lalpa’n hun vau ta hen” a ti piak zaw ta a hi.

2. Lungngai ah i beidawn hun tak leh mutheilo Pathian hi i vak mu sek a pawimaw a hi. Mi khenkhat ama leh ama kithat (Kikhailum) i tite haw khule, beidawng kisa talua ah a maban (a masang) ding le gel thei talo ah tingaina le hetalo ah kithat mai hi ding ahiu. Zia hun laitak a khun mutheilo Pathian, lungdawn lai ah panpi vak ziang thei Pathian lam vak en kha sek leu, beidawng ah kithat ziang seklo ding ahiu a, mutheilo Pathian lam enlo ah a lungzinnau lam bep uh a et khak sek zia ua tingaina hetalo ah amau leh amau kithat mai sek hi di a

hiu. Sawlchak Paul leh Sila bul dettak ah bultuk pum ah suangkul sunggil lam tak ah a khum lai ua, lin a hung kiling ah, kawtkhak zosia a hung kihawng ah, mitin kawlbute zosia a hung kiphel ziang a khanle, suangkul vengtupa kha mawchang (thiamlo chang) talua ding kahia, vaihawmtute hin bang ei law ta bep ding awm! ti a ngaitua leh lau talua in tingaina le hetalo in a chemjam a zukdawk ah ama leh ama kidawt lup ziang ding a gua mai a hi khala (Nas 16:24-31). Zia phat ah chun Paul in mutheilo Pathian lam a kawkmua ah “Lalpa Jesu ging in tichun hukdam in um inla” a ti piak a hikha. Peter tui ah tum ding ah a kisak lai a khan mutheilo Pathian lam a vak en ah “Lalpa ei panpi in” a vak ti leh “Aw ginna tawm pa, bang atia gingal la hem?” atia a vak hukdam ngal ziang khala (Mat 14:31).

3. Taksapna i tuak hun leh muthei Pathian hi i vak mu sek ding a pawimaw a hi. Mihingte hi tasamlo hial ah ki um zing ziang theilo a hi. I taksap ngawi ngawi ni le hung um kha sek a hi. Zia hun phat tak chuleh i taksapna lam bep cha

kha en zianglo in, i taksapna ei sukven piak theitu mutheilo Pathian lam i vak et seklo chun phun na ding, thasiatna ding leh lungawilona ding tamtak um thei sek a hi. La phuaktu khat in “Sum leh pai taksap leh gentheina te’n ei chum vel maleh mun a chang tapuai” a ti gual in, zia i taksapnate bep kha i lungthim ah umsaklo in mutheilo Pathian hi i lungthim luasak zawk ding a hi.

Rev. Thangngur Pathian thugen in a chia ah, An nekna ding muzolo in gilkiak tak in In a tung kit ah, a zi kiang in “An ei huan piak tia, ka gil a kial taluai” a tileh, a zi chun “Keile An huan ding umlo zia ah suan 2, suan 3 An a la ngawl keitai” a ti ta mai a hi. Zia phat ah chun amale a pindan sung lam in a lut ah mutheilo Pathian lam a vak en ta, ama gual ah taksapna tuak tamtakte chawm hingtu ding La pakhat “Taksap zia in mitthi’n ei chum maleh, la gam leh la felna’n ei gamlat kin” ti La hi a hun siam dawka ta a hi.

Mutheilo Pathian musingte banggual in a um sek awm? ti vak ngaitua tiam hitiu.

1. Mutheilo Pathian musingte chun banggual haksatna tuak

HINNA VÂK

leule lungawi tak in a thuak thei ui. I Bible changtel (Heb 11:25-27) ahin Mosi chanchin i mu, Aigupta leng In ah nuam tak ah um thei himaleh mutheilo Pathian chu a mu ziak in sawtlo sung bep limna nawpchen sang in Pathian mite tawh sukgentheina thawkkhawm ding chu a têt zaw ta a hi. Mosi thil tuakte haw hi a namai kei pua, himaleh mutheilo Pathian a mu ziak in zia haw zosia chu lungawi tak in a thuak mualsuak thei a hi.

2. Mutheilo Pathian mutute chu haksatna a thawk tam po uh leh a kipak zaw sek uh a hi. Jesu'n le tâng chung ah a thugenna a khan "Keima min ziak ah a hun ho siat ua, a hun sukgenthei ua thu phalo ah a hun hek phat uh leh lim unla kipak un" a ti ahi kha (Mat 5:11). Bang ziak ah kipak thei i hui em iti leh, mutheilo Pathian chun, a thawknau haw chu a la mu zing ah, a le tamtak ah kipakman pe ding ahi ti a hiat ziak un, a kipak zawu a hi. Sawlchak Paul khan le "Tulai thawknate haw hi, tunung ah lopina i chungua hung kilang dingte chu tawh

te pi kham in ka ngai puai" a la ti hial a hi (Rom 8:18). Jesu ngei khanle, a malam ah kipakna chu a thîl ziak in mualphona chu ngainep in Kraws ah khan a thuak a hi (Heb 12:26)

A tawpna ding in bang a ti leh mutheilo Pathian hi muthei seklo ihui em? ti hi vak ngaitua kit hitiu. Isai 59:2 na ah chun, "La khawlonau chu Pathian tawh la kikal ua daidanna'n a hung pang in, a mel a lia tâk ziak in" a ti a hi. I umdan hawilo haw leh i dukdaklonate haw khan, a mel i muna ding a lia sek ah muthei seklo dan ihui a hi. Anania leh Saphirate nupan gual ah khekichak/inguk nei kawm kawm ah Lalpa i hawl uh chun mutheilo ding ihui. Sawlchak Paul in Timothi kiang ah "Lungthim Thiangtho tak ah Lalpa min lam" a ti gual ah khan, lungthim diktak pu kawm ah, titak deu ah i hawllou a a hileh ki mawk mu zianglo dan a hi. Jeremiah 29:13 a khanle "La lunggil zosiau ah lei hawl uh chun, ei mu ngal inlau" a ti a hi. Titakzet ah i lunggil zosia hawl ah, mutheilo Pathian hi muchian thei chiat ding in Lalpa'n simtu zosia malsawm chiat ta hen.

KHRISTA THUHIATPITUTE

~ Tv. Khamlallian
Bachelor of Missiology (B.Miss)

Bang a h'em Khrista thuhiatpitute chu? Ahiloleh kuate a hi diam Khrista thuhiatpitute chu? Khrista thuhiatpitute i ti chu, Pathian thu tawh hepina ah hingkawm, a kiang tuam leh a nundan zel ah Khrista thasang a hi zia latsak zing gawtu, mihing hindan leh nunphung zosia ah Pathian thu leh hepina latsaktu ding ah ko a hi kihia, Jesu Khrista Lal leh hukdamtu ding ah pawm leh ama nungzuitute chu Khrista thuhiatpitu leh hiatpitute chu a hui. Chuleh, Khrista thuhiatpitu i hi chun Khrista hina (image) eima ah latsak a ngai ah, mani kithendanglam ngam ah, Pathian thupiak zawm ngam ding ah kipiakzaw a ngai bawk hi. Chun a thupiak lopi puang ding ah i kipawm a ngai bawk hi. Mat 28:18-19 [18] Jesu a hung ah, a kiang un, "Lei chung leh van ah thuneina zosia ka kiang ah piak ahi tai; [19] ziaziakchun, chiau inla, namtin lak ah mi nungzui in siam unla, Pa leh Chapa leh Thagau Thiangtho min in baptis un;

Khrista thuhiatpitute umdan/ danglamna (Characteristics of a Christ Bearer)

1. Hepina (Love): Khrista thuhiatpitute chu dawisak chuam neilo ah hepina neite ahiu, midangte â ding ah le malsawmna tuntu leh dawisakna nei a hi sek ui. *Joh 13:34-35 "Thupiak thak ka piak la hui, kihepiu inla, keima'n nanghaw ka hepi gual hin nanghaw le kihepiu in. La kihepiu chun mi zosia'n ka nungzuite la hui ti hun hethei ta'n au,"* a tia.

2. Zangaina (Compassion):

Khrista thuhiatpitute chu zangaina tawh hinkhua mang ah midangte â ding ah mamaw leh a pawimaw hun zel ah zangaina latsak leh mi khawtuata a hi sek ui. Zia zangaina leh hepina thu hi vak gen belap ta lehin, a ziktu keima ngei hile Pathian zangaina leh hepina ziaak bep ah zia thucha tawmcha hi zik thei bep ka hi, La phuak thiam 'Bob Hartman' chun ...*you are filled with compassion*

and mercy and grace with your banner of love over me, I am longing to see You one day face to face, And to be with You endlessly Lord, how lovely You are to me...
ti'n a la gen a, a thu hi a hawi in a dik khawpmai hi.

3. Kingâitawm/Kingâiniam (Humble):

Khrista thuhiatpitute chu a kingâitawm un, mite chung ah a talêk puau hi. Mihing zosia Pathian siam a hi ti he in mite chung ah kingâitawm in zaidam leh nunnem tak in a um thei ui.

4. Diktatna (Integrity):

Khrista thuhiatpitute chu diktat zing kawm in a hing sek un, mite â ding ah ginum tak in a hing sek ui.

Khrista thuhiatpitute lawsawn/impact (Impact of a Christ Bearer)

Khrista thuhiatpitute i hi chun i lawsawn ding chu, i kiang leh i kîmvel ah Khrista thuhiatpitu i hina i latsak ding ahin, khawvel â ding ah chi leh vâk i hi ti hiat a ngai hi.

Khrista thuhiatpitu i hi chun:

1. Kinepna petu (Bring Hope):

Khrista thuhiatpitu i hi chun kinepna petu i hi ti i kihiat a pawimaw hi. Kinepna nei talote â ding ah Jesu Khrista

ah kinepna bukim um a hi ti i hiatsak uh ngâi a hi.

2. Hepina petu (Sharing Love):

Khrista thuhiatpitute i hi chun, Khrista hepina chu mite i hiatsak a kûl in, haksat leh nat thuakte chung ah hepina i latsak a, Pathian in a natnau a hia'n, a dam ding uh a dawî hi ti i hil a pawimaw hi.

3. Pathian hina sulangtu (Reflect God's Character):

Khrista thuhiatpitute i hi chun Pathian hina leh a lopina i latsak ding ahi'n, a hepina, a lainatna leh a lungsiatna zosiate khawvel mite hiatsak chu i ko ah um a hi ti i hiat a ngâi hi.

Thukhakna: Khrista thuhiatpitu i hiu chun kona sangtak a hi ti i hiat uh a pawimaw takzet ah, mani kipiakzawna leh kipumpiak a ngâi hi ti le i hiat a ngai a, Khrista thuhiatpitu ding ah kisêk leh i kitathiam zing lai un eimau hilo ah Ama i Lal sak zing ding uh a pawimaw a, Ama Lalna taphawt ah eimau le chawisa'n ah um ding ihui ti i hiat zing uh a pawimaw hi. Pathian Thagau Thiangtho hâtna chang in, i nun ua Jesu Khrista thuhiatpitu i hinau latsak thei ding leh mite â ding ah chi leh vâk hi thei ding in Pathian in ei umpi chiat taken.



S. Kawtlian Pastor Bial KNP Anngawl Pauchap (19-04-2025)
A mun : Leisang Kochuam Biak In



Thembasuk Pastor Bial KNP kivetuana (01-05-2025)
A mun : Pillangkata Kochuam Biak In



Gangpimual Pastor Bial KNP Anngawl Pauchap (10-05-2025)
A mun : Olive Kochuam Biak In